



"I te cherdí con to ennom" dij le Signur.

La ploania d'La Pli tol sò con ligreza te sòa comunité **Damian Erlacher** (Cargá) y ti fej les miús aodanzas ai geniturs Günther y Manuela: Idio, la Oma dal Ci y le Sant Patron acompagneii Osc môt con sòa benedisciun y proteziun.



Enformaziuns y termins

Ocio - Comun de Mareo/1: al ven lascé alessi che i ufizi de comun romagn slúc dai 02.02 ai 28.02.2021. Tut fora é vigne dedemesaledema dales 09:00 ales 12:00 y dales 15:00 ales 18:00.

Comun de Mareo/2: i sac dal ciomont ven endò partís fora por döt l'ann. Porchel seise der bel enviés/enviades da passé te Comune, **anter forá**, a s'ai do: **le dedemesaledema dales 9:00 ales 12:00. Chi co oress gni le dedemesaledema domisdé dales 15:00 ales 18:00 é der bel periés da i prenoté danfora.** Al gnará partí fora i sac por l'ann 2021 aladò dal numer che vignönn/a a adoré tal ann 2020. Al é ince la poscibilité da i aposté danfora por telefon al ☎ 0474 503760 o por e-mail a margareth.rubatscher@comun.mareo.bz.it. An ven recordé che sce zacai adorass ciamó sac ia por l'ann nen ciararán ma plü sön prenotaziun!



Canche la dlizia s'la ri

En iesuit y en capeziner á albü na lungia discussiun sora la compatibilité danter le perié y le fômé. Deache ai n'ea nia bogn da gni a öna á fat fora da scrí ala congregaziun dla fede a Roma. Do che ai á ciáfé la resposta s'endünai endò. Le capeziner dij: „Roma á rospognü a mia domanda sce an pó fômé dertan ch'an preia con en tler „NA!“ „Enteressant“, rospogn le iesuit „a mia domanda sce an pó perié dertan ch'an fôma, ái scrit zoruch sogüsc „POA!“

La oma fej jí picio Friz sò n calogna. Ara ti racomana al môt: „Canche signor ploan ven a daurí spo messte pa te recordé da dí bel: „Al sii laldé Gejú Crist!“ Canche Friz róa endò a ciasa damana la oma sce al á ben fat desch'ara ti á dit. Friz rospogn döt brau: „Al é gnü la cöga a daurí, spo ái pa dit: „Salve Regina!“

Döt le bun a:	Elisabetta Ploner Forer, <i>Bronech</i>	* 09.02.1941
	Rosina Pedevilla, <i>Bornech</i>	* 09.02.1941
	Tone Erlacher	* 11.02.1930
	Signor Heinrich Perathoner, <i>curat</i>	* 11.02.1941
	Maria Kastlunger Pescolliderungg, <i>Colfosch</i>	* 11.02.1946
	Eduard Rovara	* 12.02.1936
	y a duc chi co á santennom y complesc i agn cöst'edema	


Impressum: Ploania d'La Pli; redaziun Franz Rigo y Edith Willeit
Comunicaziuns: cina le dedemesaledema sera a Franz Rigo, ☎ 0474 500978 o ✉ ploania@gmx.net
Download plata: www.unitepastorala.org



Plata dla Ploania La Pli de Mareo Santa Maria dal Bun Consei

Ploan: Signor Klaus Sottsas
✉ klsottsas@rolmail.net

Calogna Al Plan: ☎ 0474
501006
Radio de Ploania: 93,00 MHz



VAL BADIA

www.unitepastorala.org

Ann B

07.02.2021 - 5. domegna ia por l'ann

n. 11

Encunté le Signur por varí y se salvé

📖 Iob 7, 1–4,6–7 | 1 Cor 9, 16–19,22–23 | Mc 1, 29–39

Dal Vangelo do San Merch:

Te chel tomp ²⁹é Gejú jü deboriada con laco y Jan tla ciasa de Scimun y d'André. ³⁰La jócera de Scimun ea con borjú te let. Ai ti á cunté de d'era a Gejú, ³¹y al é jü da d'era, l'á tuta por la man y l'á daidada sò. Danló ti él jü demez le borjú, y ara i á sorví. ³²Da sera, do che soredl ea florí, án condüt duc i amarés y i indemoniés da Gejú. ³³Döta la ciüté s'á abiné adöm dan porta de ciasa ³⁴y al nen varía trec co á de vigne sort de maraties y al pará fora trec demonns. Y al ti proibía ai demonns da baié; ciodí ch'ai sá che che el ea. ³⁵Da doman, ciamó a scür, él loé y é jü te n post soront a perié. ³⁶Scimun y chi co l'á acompagné ti é debota jüs do, ³⁷y canch'ai l'á ciáfé, ti ái dit: Düc te chir! ³⁸Al ti á respognü: I jun altró tai paisc dampró a pordiché ince danló; ciodiche por cösc sunse pö gnü. ³⁹Al rodá por döta la Galilea, pordicâ tles sinagoghes y pará fora i demonns.

I ponsun do: Con sü mirachi ô Gejú nes dí che la creaziun é destinada ala perfeziun. Desche la jocera de Pire ven delibrada da sòa soferenza y desche i püri da Cafarnao varesc canch'ai encunta Gejú, ensciö dess varí döt le monn. Ince aldedancö se mostra le Signur val' iade belo en to' de monn nò.

I periun: Dio onipotent, entres endò sunse tontés al mal. Lascesse sontí la potenza de töa Parora, ciáfé varijiun dal'encuntada con te y condüjese sön to tru. Por Crist, nosc Signur.

Vesco Wilhelm Egger "Sonntagsbibel"



📖 Letôres dla 6. domegna ia por l'ann:

Lev 13, 1–2,45–46 | 1 Cor 10, 31 – 11, 1 | Mc 1, 40–45

Edema liturgica dai 07.02. ai 14.02.2021

DOM 07.	5. domegna ia por l'ann De dla vita <i>Richard, Eugenio</i>
08:30	gran messa en onú de Santa Maria por dōta la ploania s.m. por la familia de Sotru y sōes families <i>oferta por la ploania</i>
14:00	funziun dal Bato de Damian Erlacher
<i>10:00</i>	<i>s.m. a Al Plan</i>
Lön 08.	<i>Hieronymus Ämiliani, Josefina Bakhita, Filip</i>
<i>18:00</i>	<i>s.m. a Al Plan</i>
Ded 09.	<i>Apolonia, Alexia, Anna Katharina</i>
07:30	s.m. d'aniversar por † Berto Ellecosta, Longega s.m. por † Jan Maneschg, da Poz s.m. por †† dla fam. Hubert y Maria Feichter, Tescere
Dem 10.	<i>Scolastica, Wilhelm, Silvan</i>
Jöb 11.	memoria de Santa Maria da Lourdes - de mondial dai amarés, Anselm
19:30	s.m. en onú de Santa Maria da Lourdes por la sanité s.m. por vis y †† dal Cargá s.m. por † Carlo Ploner, Corterei
Ven 12.	<i>Gregor II, Benedet</i>
<i>07:30</i>	<i>s.m. a Al Plan</i>
Sab 13.	<i>Sabeda de Santa Maria Adolf, Gisela</i>
<i>18:00</i>	<i>s.m. prefestia a Al Plan</i>
19:30	s.m. prefestia por † Vittoria Pedevilla Ellecosta, La Pli s.m. por † Jep Konrater, Biei s.m. por les Püres Armes
DOM 14.	6. domegna ia por l'ann <i>Ziril y Metode (patrons d'Europa), Valentin</i>
08:30	gran messa por dōta la ploania <i>oferta por la ploania</i> s.m. por †† Jan y Valeria Ellecosta, Gogn
<i>10:00</i>	<i>s.m. a Al Plan</i>
<i>ampola:</i>	en onú de Santa Maria
<i>ministronc:</i>	• dedolönesc y sabeda: Sara y Emma C. • jöbia y domegna: Noemi y Sabine
<i>i recordun:</i>	Rosa Baldissera Radonski, <i>Berlin</i> † 11.02.2019



Por le dé dla vita

Dio dla vita

*Signur, i podun festejé deboriada che tö es en Dio dla vita.
Tö es gnü a nes encündé la pleneza dla vita.
Con reconescionza orunse pié do cōsta scincunda y te laldé y te glorifiché.
I sun plens d'amiraziun por le miraco dla vita umana, mo ince por vigne vita che tö as cherié.
I te periun, ciara de nos y dandadöt de nüsc mituns co é nosta speranza y nosta ligreza.
Ví con nos sōn nosc tru y láscesse sontí l'esperionza che tö es pa nos.
Benedescesse y fá ch'i sunse bogn da tó nostes dezijiuns do töa orenté y do to ejempl. - Amen*

Oraziun por le 29° de mondial dai amarés

11 de forá 2021

„Önn su é osc Maester, os seis düc fredesc“
(Mt. 23,8)

La creta danter les porsones desco fondamonta de na cura deplen dal amaré.

Pere sant, nos sun tü mituns y düc fredesc. I cunesciun to amur por vignönn/a de nos y por dōta l'umanità. Deidesse romagne te töa löm per ester bogn da cresce tal amur önn por l'ater, y da ti sté dlungia a chi co patesc tal corp y tal spirit.


Gejú fi tan amé, der om y der Dio, tö su es nosc Maester. Ensegnesse da jí ennant tla speranza. Deidesse ch'i sunse bogn - ince sce amarés - da emparé da te da azeté la deblezes dla vita. Scinchi la pesc a nostes temes y confort a nüsc patimonc.

Spirit consoladú, tü früc é pesc, ciarité y bunté. Alesireia le peis de dōta la jont tocada da cōsta pandemia y da d'atres maraties. Varesc con to amur les relaziuns ferides, deidesse a nes pordené, convertesc nüsc cōrs, che ai sái da s'an tó sora dai atri.

Maria, testemona dla speranza pa la crusc, preia por nos.



La Bibia cuntada ai mituns (5)



Chel Bel Dio salva so popul

Le popul de Israel viea empröma tal Egit. Enló laorái Israelic desco stlavs y messá ti sté sot ai egiziagn. Porchel orei s'an sciampé y â ensciö cherdé Chel Bel Dio do aiüt. El â spo cheri fora Mosé por condü le popul de Israel fora dal Egit. Tla trognera co vardea s'â Chel Bel Dio dé da conesce a Mosé, al ti â dit „ lu sun chel co é atló“.

Le iade da jí demez dal Egit á condüt i Israelic carant'agn fora por le desert. Chel Bel Dio ti á entres empormetü che al ea pa d'ei. Sōn la munt de Sinai ti â Chel Bel Dio dé al popul de Israel i diesc comandamonc, co á cina aldedancö na gran emportanza.

Ala fin de so iade é le popul de Israel roé la tera de Cánan, olá che al s'á spo lascé jö. Ai ea sen ledi y podea meter man na vita nea. Mo con le passé dai agn se recordái ma plü danré che Chel Bel Dio i â delibré dla stlavitü dal Egit.

Ensciö ti â Chel Bel Dio mené profec. Ai dea ti daidé recordé al popul Chel Bel Dio y ti porté sōa noela. Al ven cunté de trec profec: Elia y Isaia, Amos y Iona y tanc d'atri.